



SAKSFRAMLEGG

Sakshandsamar: Marianne Soleng	Arkivkode: FE-033
Arkivsaksnr: 20/767	Løpenr: 20/7998
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Kommunestyret	16.09.2020	047/2020

Faste saker

16.09.2020 Kommunestyret:

Handsaming i møtet:

Godkjenning av møteinnkalling og sakliste

Ordførar Knut Harald Frøland (Bl) foreslo å endra rekkefølga for handsaming av ein del av sakene på saklista, slik at dei sakene som gjeld teknisk vart handsama først. Dette gjaldt sak 051, 056, 062 og 063. Kommunestyret slutta seg til dette.

Odd Arne Haga (Frp) spurde kvifor formannskapssakene 020/2020 (Heis på kommunehuset) og 021/2020 (Tilstandsrapport ungdomsskulen og kommunehuset) ikkje stod på saklista for kommunestyret 16.09.2020. Ordførar Knut Harald Frøland svarte at sak om heis på kommunehuset stod på saklista. Han orienterte òg om bakgrunnen for at sak om tilstandsrapportar for ungdomsskulen og kommunehuset ikkje var eiga sak på saklista.

Jon Magne Borgevik viste til grunngjevne spørsmål frå Frp til møtet. Han meinte at fleire av desse spørsmåla heller burde vore interpellasjonar. Karl Bård Kollbotn (Frp) orienterte om kvifor ingen av spørsmåla var meldt inn som interpellasjonar.

Det var ingen andre merknader til møteinnkallinga eller saklista.

Etter handsaminga av den siste saka i møtet (sak 061), tok Linda Haug Kollbotn (Frp) opp spørsmål om kvifor sak om investeringar til kyrkjene ikkje stod på saklista. Ho viste til vedtak i kommunestyret 11.06.2020 i sak 036, der det står at "andre tiltak som kyrkja ønskjer vert vurderte i september saman med andre kommunale investeringar". Konkret gjeld dette ringjeanlegg i kyrkja på Ådland og utskifting av lysarmatur til led-lys i kyrkja på Haga. Ordførar Knut Harald Frøland bad om at saka kjem opp i neste møterunde i formannskapet og kommunestyret.

Eventuelle merknader til protokoll frå førre møte

Ingen merknader.

Interpellasjonar

Det var kome inn to interpellasjonar til møtet, begge frå MDG. Interpellasjonane vart handsama før orienteringssakene i møtet. I samband med handsaminga av interpellasjonane var det òg ei orientering ved Bjørnafjorden landbrukskontor.

Rådmannen orienterer:

Ny kommunal heimeside

Kommunen skal få ny heimeside, etter same oppsett som heimesidene til dei andre kommunane i IKT Nordhordland. Målsetting om lansering før nyttår.

Svar på spørsmål om vegnummerskilt

Svar på spørsmål stilt av Jon Magne Borgevik (Ap) i kommunestyret 11.06.2020. Bakgrunnen for at det er sett opp skilt med vegnummeret berre på den eine sida, er delvis at det vart gjort ei feilbestilling og delvis økonomiske årsaker.

Svar på spørsmål om status for utskifting av vass- og kloakkørør på Tysse

Svar på spørsmål stilt av Jon Magne Borgevik (Ap) i kommunestyret 18.06.2020. Prosjektet er noko forseinka som følgje av koronasituasjonen og kapasitetsmangel i eining for samfunnsutvikling.

Status forprosjekt Fossen bratte

Fylkeskommunen har gitt tilsegn om tilskot på inntil 200 000 kroner til forprosjekt Fossen bratte. Tilskotet er planlagt brukt til konsulentbistand for å få gjennomført forprosjektet. På grunn av koronasituasjonen og sjukefråvær i administrasjonen er konkurranse om dette konsulentoppdraget enno ikkje gjennomført, men det er no klart for å kunngjera konkurransegrunnlaget. Målsettinga er no at forprosjektet skal vera slutført ved utgangen av 2020.

Status for arbeidet med VA og gang- og sykkelveg i Eikedalen

Statusrapport vart gitt i naturutvalet 01.09.2020, og går fram av naturutvalet sin møteprotokoll. Rådmannen las opp frå møteprotokollen.

Tunnel Kvamskogen

Statusrapport vart gitt i naturutvalet 01.09.2020, og går fram av naturutvalet sin møteprotokoll. Rådmannen las opp frå møteprotokollen.

Moglegheitsstudie Bjørkheimsområdet

Moglegheitsstudien ligg inne som tiltak i budsjettet for 2020, der det er løyvd 250 000 kroner til dette arbeidet. Denne saka heng saman med arbeidet med revisjon av områdeplanen for Bjørkheimsområdet. Arbeidet med sjølv moglegheitsstudien har enno ikkje kome i gang. Statusrapport for arbeidet med områdeplanen vart gitt i naturutvalet 01.09.2020, og går fram av naturutvalet sin møteprotokoll. Rådmannen las opp frå møteprotokollen.

Grunngjevne spørsmål

Frp hadde sendt inn ei rekke grunngjevne spørsmål til dette kommunestyremøtet. Rådmann Ingebjørg Vamråk las opp både spørsmåla og administrasjonen sine svar. Administrasjonen sine svar ligg som vedlegg til møteprotokollen.

Rådmannen orienterte om at administrasjonen ikkje visste kva dei to forkortingane (FV og KV) som var brukt Frp sine spørsmål om kommunal infrastruktur står for/betyr. Karl Bård Kollbotn (Frp) orienterte om at forkortingane står for førebyggjande vedlikehald og korrektivt vedlikehald.

Ordførar Knut Harald Frøland (Bl) viste til at kommunen har ein praksis med at det berre er grunngjevne spørsmål i kommunestyret, ikkje i formannskapet eller naturutvalet. Han sa at det kanskje bør vurderast å opna for grunngjevne spørsmål òg i formannskapet og naturutvalet, og at dette kan drøftast i formannskapet sitt neste møte.

Utvalet sitt kvarter

Prioriteringar for utbetring av kommunale bygg

Odd Arne Haga (Frp) viste til spørsmål om prioriteringar for utbetring av kommunale bygg som han stilte i kommunestyret 18.06.2020, som han framleis ikkje har fått svar på. Ordførar Knut Harald Frøland (Bl) viste til at han hadde svart på spørsmåla tidlegare i møtet, under godkjenning av innkalling og sakliste.

Overskot 2019 og avsettingar til disposisjonsfondet

Odd Arne Haga (Frp) las opp følgjande spørsmål:

- *"I utvalgets kvarter i kommunestyremøte 13/8 – 2020 viste eg til Årsrapporten 2019, side 16 av 222, første avsnitt hvor det står følgende: «Kommunen leverte eit overskot på om lag 2,1 millionar kroner, inkludert avsetningar til disposisjonsfondet. Representanten Øyvind Strømmen leverte ein replikk på opplysningen som påsto at dette var feil. Denne replikken ble stående ubesvart. Eg ber om derfor om en bekreftelse på om det som står i årsrapporten er korrekt."*

Økonomisjef Nina Erdal orienterte om at det både er korrekt at kommunen hadde eit overskot på 2,1 millionar kroner i 2019 (medrekna avsettingar til disposisjonsfondet) og at kommunen hadde eit mindreforbruk på 20 000 kroner i 2019. Ho orienterte og om at frå og med rekneskapsåret 2020 vil mindreforbruk ikkje lenger verta brukt som omgrep i kommunale årsrekneskap.

Involvering av rådet for personar med nedsett funksjonsevne

Oskar Røen (MDG) orienterte om ønske frå rådet for personar med nedsett funksjonsevne om å verta meir involvert i byggeplanlegging og samfunnsutvikling, og få moglegheit til å gje tilbakemelding slik at ting vert tilrettelagt for personar med nedsett funksjonsevne. Han viste her til to konkrete eksempel:

- Det ikkje er mogleg for personar i rullestol å koma seg inn på handikapptoalettet i Hagabotnane utan hjelp, fordi døra er tung og ikkje held seg open sjølv.
- Det er vanskeleg for personar i rullestol å koma seg opp frå banen til bygget der kiosken er, fordi det er ein kant der. Denne kanten vil kunne fjernast med for eksempel litt asfalt.

Leiar teknisk drift, Nils Jonny Skar, svarte at administrasjonen sjølvagt ønskjer å ta med dei ulike brukargruppene når bygg og anlegg skal planleggjast og tilretteleggjast, og at dette må ein få til òg når det gjeld personar med nedsett funksjonsevne.

Leikeplass på Bjørkhaugen

Oskar Røen (MDG) viste til at det er planar om å starta ei velforeining på Øvre Steinsland, med ønske om å få restaurert leikeplassen på Bjørkhaugen. Han spurde om det er gjort tilstandsvurdering av leikeplassen, som ligg på kommunal grunn. Han spurde og om det er eller vil verta sett av pengar til slikt arbeid i budsjettet. Leiar for teknisk drift, Nils Jonny Skar, stadfesta at leikeplassen er ein kommunal eigedom. Han sa òg om at administrasjonen saman med velforeininga vil sjå på kva som må gjerast dersom leikeplassen skal setjast i stand, og på kva dette i så fall vil kosta.

Vegskilt til Landhandleriet og Laga

Arild Røen (H) viste til at det framleis står oppe vegskilt til Landhandleriet på Tysse og Laga på Bjørkheim, sjølv om det no er ei god stund sidan begge desse butikkane vart lagt ned. Ordførar Knut Harald Frøland svarte. Han orienterte om at det vert arbeidd med å prøva å få starta opp med ny butikk på Tysse, og at dette skiltet derfor ikkje bør takast ned enno. Han var samd i at skiltet til Laga

bør takast ned.

Avtale om helsereiser

Solveig Vassenden (Bl) spurde om status for avtale om helsereiser, som Samnanger er med på og som gjekk ut måndag denne veka. Ordførar Knut Harald Frøland (Bl) orienterte om status for denne saka. Helse Bergen har opplyst at dei i første omgang vil halda fram med eksisterande ordning i fire veker, og håpar at dei innan dette har klart å verta samde med taxi-næringa om ny avtale for mellom anna pasientar frå Samnanger.

Leikeapparat på Samnanger barneskule

Øyvind Steinsland (Bl) viste til interpellasjon og kommunestyrvetak om leikeapparat på barneskulen tidlegare i 2020, og at denne saka har vorte utsett. Han spurde om administrasjonen vil prioritera denne saka. Leiar teknisk drift, Nils Jonny Skar, orienterte om status i saka. Det er bestilt både fallunderlag og ein del leikeapparat til barneskulen. Leikeapparata vil truleg vil verta montert rundt veke 42.

NHO-rangering

Jon Magne Bøgevik viste til at Samnanger vart vurdert som nest dårlegast i ei rangering av norske kommunar som nyleg er gjort/presentert av NHO. Han spurde om dette er noko kommunen vil prøva å gjera noko med. Ordførar Knut Harald Frøland svarte.

Branntryggleik/brannvernutstyr i kommunehuset

Monica Tjønnå stilte nokre spørsmål om branntryggleik/brannvernutstyr i kommunehuset. Leiar teknisk drift, Nils Jonny Skar, svarte og orienterte om kva krav som gjeld for kommunehuset.

Spørsmål om uttak for slukkevatt i Haukanestunnelen

Monica Tjønnå (Sp) viste til arbeidet med ny vassleidning som for tida pågår i Haukanestunnelen. Ho spurde om det vil verta mogleg for brannvesenet å kopla seg på vassleidninga i utgangane av tunnelen. Leiar teknisk drift, Nils Jonny Skar, svarte og orienterte om at det er fylkeskommunen som har ansvaret for prosjekteringa av arbeidet i Haukanestunnelen.

Høyring om forslag til reviderte statlege planretningslinjer for differensiert forvaltning av strandsona

Monica Tjønnå (Sp) viste til at regjeringa har sendt forslag til reviderte statlege planretningslinjer for differensiert forvaltning av strandsona ut på høyring, med høyringsfrist 01.10.2020. Ho spurde om Samnanger bør gje uttale i denne høyringa. Ordførar Knut Harald Frøland (Bl) orienterte om at kommunen ikkje har prioritert å arbeida med denne saka, av kapasitetsmessige årsaker.

Spørsmål om tømning av kloakk

Karl Bård Kollbotn (Frp) stilte spørsmål om kvar firmaet som utfører slamtømming i private slamavskiljarar i Samnanger, tømmer kloakken. Leiar teknisk drift, Nils Jonny Skar, orienterte om at han ikkje veit konkret kva avtalar det innleigde firmaet har inngått om tømning, men at det mellom anna er mogleg for dei å tømme kloakken i kommunale slamavskiljarar på Gjerde og i Rolvsvåg. Karl Bård Kollbotn bad om at administrasjonen sjekkar kvar firmaet tømmer kloakken, og at kommunestyret får tilbakemelding om dette. Nils Jonny Skar stadfesta at administrasjonen vil sjekka dette.

KS- 047/2020 Vedtak:

Møteinnkallinga og saklista vert godkjent.

Rådmannen sitt framlegg til vedtak:

- Møteinnkallinga og saklista vert godkjent.
- Delegerte vedtak/referatsaker vert tekne til orientering.

Oversikt over faste saker:

Godkjenning av innkalling og sakliste.

Eventuelle merknader til protokoll frå førre møte.

Delegerte vedtak/referatsaker.

Utvalet sitt kvarter.